

Mr. drs. Piet Pronk a haya un entierro merecido, digno y respetuoso

UN homber noble, un erudita, persona correcto, integro, envolvi socialmente manera Piet Pronk lamentablemente no tin dos. Despues di un enfermedad cortico, Piet a bay laga tur cu a conoce, cu un soledad grandi atras. Palabranan tabata falta pa describi Piet na e miho manera. Amigo di hopi, consehero di hopi mas y principal consehero di Prome Minister Mike Eman, kende notablemente tin hopi dificultad cu fayecimento di su amigo, su confidente y consehero den tur paso cu e tuma.

Diabierna durante su ultimo recorrido riba su isla stima, Piet a pasa dilanti su cas, Universidad di Aruba cu a wordo funda dor di Piet den un tempo dificil na 1987, Colegio Arubano unda e tabata conector y un mentor pa hopi alumno, na Cas di Partido, e partido pa cual e tabatin gran aprecio, dilanti Bestuurskantoor unda e tabata traha incansablemente y tabata kier a bin traha bek, loke no a sosode. Tur caminda unda el a pasa a pone krans riba su caha y palabranan emocional recordando Piet a wordo bisa dor di tur cu a stim'e y a apreci'e.

Di Bestuurskantoor Piet a bay kerki unda dominee Hazenoot a duna un sirbishi bunita. Kerki tabata yen. Coro bou guia di sra. Maybelline Arends-Croes, ex-colega di Piet na Colegio, a canta sumamente bunita. Rector di Universidad Glenn Thodé a papia den forma conmovedor, recordando con Piet a cambia su bida den forma positivo. Ex-sindicalista Ivo Valdez a recorda e tempo den SIMAR cu Piet, temponan cu no ta bin bek. Uzando palabranan di Piet, Valdez a termina bisando 'Hombo mano, mi ta bay haya bo falta'. Amigo di hopi añña Rene 'Baba' Herde a recorda e amigo leal cu Piet tabata y el a bisa esey den nomber di su amigonan di tur tempo cu a compañía Piet henter diabierna na su ultimo luga di sosiego.

Prome Minister Eman tabatin hopi dificultad pa papia y expresa tur loke Piet a nifica p'e, desde e tabata bay Colegio sin tabata mucho amigo di scol.

"Con por ta posibel cu tanto calidadnan, super inteligente, social, fuerte, leal, integro, chis-

toso y semper cla pa yuda ta bin hunto den un solo persona y e persona ey a bin Aruba y a toca bida di hopi."

El a puntra dominee si e no ta kere cu esaki ta un acto di Dios y dominee a dun'e razon. Eman ta puntra su mes tambe con e mester sigui, awor cu su man drechi a bay pa no bin bek. Piet tabata mas cu su consehero, e tabata su sosten y amigo leal di dje su famia y partido. Despues di Prome Minister Eman e tres yiu muhenan di Piet a conta di nan tata, cada un nan nan manera, recordando e di un forma diferente. Agradecido pa tur loke el a siña nan den bida. Den nomber di mama Tiny nan gradici tur presente.

Despues di un bunita sirbishi di dominee Hazenoot, a sigui e caminda dificil pa hiba Piet na su ultimo luga di sosiego na Santana Protestant na Piedra Plat. Un dia duro. Piet ta trankil awor y un dia cada un di nos lo topa bek cu ne. Y... en berdad, manera a wordo expresa...su luga ta dificil pa yena.

